

Dia tidak tahu di mana hendak letakkan mukanya. Bukan satu kelas, bahkan satu sekolah sudah tahu. Gara-gara sayur keladi yang dihantar ke rumah agam di atas bukit petang semalam. Air mukanya ketika itu bagaikan melurut jatuh ke lantai lalu dipijak orang ramai.

Aroma sayur keladi yang telah dimasukkan daun kesum tetap berapungan di dapur. Sebentar lagi pasti Mak Habibah memanggilnya. Entah alasan apa pula hendak diberikan. Tidak mungkin dia membohongi seorang ibu yang sekian lama dihormati dan disayangi. Bagaimanapun, Mak Habibah harus tahu. Barangkali setelah Mak Habibah tahu, tidaklah lagi dia menyuruhnya menghantar sayur keladi ke rumah agam di atas bukit itu.

"Nah, pergi hantar sayur keladi ini ke rumah Tuan Muslim. Tentu dia suka. Dulu sewaktu mak jual di pasar tani, tiap-tiap hari dia datang beli."

"Tapi ingat, selepas hantar terus balik. Jangan tunggu Tuan Muslim balas. Bekas ini tinggalkan saja. Esok-esok boleh pergi ambil."

Amalan menghantar juadah makanan kepada jiran terdekat sudah menjadi rutin kepada Mak Habibah. Sengaja dia memasak lebih untuk diagihkan rezeki itu kepada jiran. Islam menggalakkan perkara itu. Siapa yang tidak mahu mencari pahala secara mudah sebagai bekalan saham akhirat. Namun begitu, tidak sesekali dia mengharap balasan daripada jiran.

Sayur keladi yang dihantar semalam dibalas dengan sekeping pizza oleh Tuan Muslim. Berkali-kali Mulya menolak untuk tidak mengambil pizza itu. Namun begitu, Tuan Muslim seperti memujukannya untuk menerima pizza itu. Katanya, "bukan selalu kamu dapat makan pizza. Di kampung ini tidak ada kedai yang menjual pizza. Kalau ada pun di bandar. Harganya melebihi 10 mangkuk sayur keladi."

Sewaktu pulang dari sekolah, Tasnem memberitahu bahawa Zailan ada mencatat sesuatu pada dinding Facebooknya. Paling dia tidak boleh terima apabila Zailan memuat naik gambar sayur keladi pemberiannya dengan pizza yang dibalas oleh Tuan Muslim. Zailan cuba membanding-bandingkan antara kedua-dua makanan tersebut.

"Mulya, kalau kau hendak pikat Zailan pun hantarlah makanan yang sedap-sedap sikit. Ini tidak, sayur keladi saja."

Kata-kata itu pernah terpacul dari mulut seorang rakannya di sekolah. Dia tidak menyangka niat baik ibunya itu ditafsir dengan buruk. Akhirnya, dia juga kena tempiasnya."

"Mak, Mulya nak beritahu sesuatu kepada mak. Mulya harap, mak jangan kecil hati."

"Ada apa?"

"Esok tak perlulah kita hantar sayur keladi ke rumah Tuan Muslim lagi."

"Kenapa pula?"

"Tentu Tuan Muslim jemu. Hari-hari makan sayur keladi."

"Dulu boleh. Takkan sekarang jemu."

"Dulu lain mak. Sekarang lain. Sekarang Tuan Muslim bukan peniaga sayur lagi. Sekarang Tuan Muslim ahli perniagaan. Tuan Muslim sudah menjadi orang terkenal. Tentulah kehidupannya juga berubah. Kalau kehidupannya berubah, makannya juga sudah pastilah yang hebat-hebat. Makanan orang kaya."

"Sebenarnya, apa yang Mulya hendak beritahu emak? Mengapa perlu hendak beza-bezakan makanan itu dan ini? Bukankah semua makanan itu sama saja. Allah tidak pernah membeza-bezakan rezeki untuk umatnya. Yang diseru-Nya carilah makanan yang halal dengan cara yang halal. Jangan kerana perbezaan cita rasa kita berbalah."

Sememangnya, Mulya berasa tidak sepatutnya dia membangkitkan hal makanan itu pada ibunya. Mak Habibah tidak pernah merungut akan rezeki yang diperoleh. Jauh sekali berasa cemburu dengan juadah makanan yang istimewa yang disantapi oleh kebanyakan orang kaya.

Mak Som seperti biasa menyambutnya di muka pintu dengan sekuntum senyuman. Barangkali bagi Mak Som, sayur keladi itu juadah istimewa yang dimasak oleh chef yang bertaraf lima bintang. Biar pun sudah diberitahu agar tidak perlulah Mak Som susah-susah membalas bekas sayur keladi yang dihantar, tetapi Mak Som tetap membalasnya. Mak Som seperti seorang yang sangat menghargai pemberian orang.

Keesokannya, seperti biasa Tasnem memberitahu status terkini Facebook Zailan. Kali ini Zailan telah menconteng dinding Facebooknya dengan menulis; Ada orang sudah miang-miang keladi. Tetapi sayang, keladi itu keladi yang tumbuh di tepi acar, tempat bermain ayam dan itik. Orang yang bermain dan mencari makan di tempat yang kotor ada hati hendak memikat jejak yang tinggal di atas bukit.

Sayur Keladi di Atas Bukit

Apakah motif Zailan menulis begitu? Hina sangatkah sayur keladi ibunya?

Mulya juga kurang faham, apabila Zailan mengemas kini status Facebooknya, pasti ramai yang meninggalkan komen yang bersetuju dengan apa saja yang dikatakannya itu. Sudah menjadi kelaziman apabila apa saja yang diperkatakan oleh orang yang popular dan berkedudukan pasti dianggap betul dan hebat.

"Cara paling mudah untuk orang susah merasai nikmat makanan ialah dengan menukar juadah sesama jiran tetangga yang lebih kaya raya. Bayangkan, semangkuk sayur keladi boleh ditukar dengan ayam percik ataupun chicken chop."

Gurauan Zailan sudah keterlaluan. Mulya berasa sangat tidak adil. Dia tidak dapat membela maruah keluarganya. Sekiranya dalam Facebook tidak boleh, itu tidak bermakna Zailan masih boleh bertindak sesuka hati. Dia bercadang hendak bersemuka dengan Zailan untuk menyelesaikan segala permasalahan.

Petang itu, Mulya menapak ke rumah Tuan Muslim. Berdiri di depan pintu pagar rumah banglo yang dibina hampir satu juta itu menyebabkan hatinya berdetak-detak. Dia menekan loceng sekali. Sebelum ini, dua tiga kali dia menekan loceng barulah Mak Som muncul di depan pintu. Bukan kerana Mak Som

sudah tua sangat, tetapi dapur Tuan Muslim yang jauh terkebelakang menyebabkan Mak Som perlu menapak agak jauh.

Tidakkah keputusannya melulu? Sempat lagi untuknya berpatah balik. Bagaimanapun, ketika Mulya berpaling untuk turun dari atas bukit itu, pintu pagar yang bersalut dengan warna keemasan bergerak terbuka. Betapa terkejutnya dia apabila Tuan Muslim muncul di belakangnya.

"Mulya."

"Er ... Tuan Muslim."

"Ada apa Mulya? Nak jumpa Zailan ke?"

"Er ... tak ada apa-apalah. Mulya balik dulu."

"Eh, itu di tangan kamu apa?"

"Oh, terlupa pula! Ini mak suruh hantar sayur keladi."

"Terima kasih. Dah lama saya tak makan sayur keladi. Tempoh hari, saya tak sempat jamah. Saya terpaksa bergegas ke luar negara atas urusan perniagaan."

"Mulya jangan kecil hati, dengan kata-kata saya tempoh hari. Saya tak bermaksud apa-apa pun."

Seharusnya, bukan sekali Tuan Muslim meminta maaf. Setelah segala yang telah dibarkan tentang sayur keladi di Facebook Zailan, Tuan Muslim perlu bertanggungjawab. Benar kata orang dulu, terlajak perahu boleh diundur, terlajak kata badan binasa.

"Saya faham." Mulya masih dapat mengawal emosinya daripada marak. "Masakan hendak disamakan nilai semangkuk sayur keladi dengan sekeping pizza. Sudah tentulah sekeping pizza itu mahal untuk dibeli kerana rasanya juga lebih lazat daripada sayur keladi yang hanya dikutip di tepi acar." Mulya berasa semangatnya kuat untuk mempertahankan maruah keluarganya. Sebab itulah kata-kata itu melompat keluar ke tengah gelanggang perdebatan.

"Eh, Mulya sudah salah faham! Saya tak pernah samakan sayur keladi itu dengan makanan yang dicari oleh ayam ataupun itik di tepi acar."

"Tuan Muslim, satu kampung sudah tahu. Rasanya satu dunia pun. Saya tahu saya tidak ada Facebook, tetapi mulut manusia akan bercakap-cakap setelah mereka membaca. Adakah dengan menyebarnya di Facebook, orang itu lebih berasa puas?"

"Mulya, saya juga pernah susah seperti ibu kamu. Untuk saya berada pada tahap sekarang ini bukan mudah. Saya perlu berusaha untuk mendaki tangga kejayaan. Sewaktu mendaki itu pelbagai dugaan dan ujian yang perlu saya tempuhi. Saya bermula dengan peniaga sayur kecil-kecilan di pasar tani. Ada kala sayur yang saya jual tidak laku. Sayur tidak boleh simpan lama.

Maka, saya menanggung kerugian. Setelah saya ada sedikit wang, saya mohon untuk berniaga di pasar besar dengan sewa yang ketika itu tidaklah semahal kadar sewa sekarang ini. Kemudian, saya terus berusaha dengan menjadi orang tengah untuk memasarkan hasil tani penduduk kampung. Hinggalah saya mampu membuka perniagaan sendiri. Jadi, mengapa setelah saya berjaya saya hendak melupakan orang di bawah yang pernah membantu dan memberi dorongan kepada saya."

"Habis, mengapa setiap kali saya hantar sayur keladi ke rumah Tuan Muslim, Zailan akan menulis sesuatu pada Facebooknya? Kata-kata yang dicoretkan itu sangat tajam untuk mengguris hati sesiapa pun yang membaca."

"Setiap hari?" Wajah Tuan Muslim berkerut keliru.

"Ya, setiap hari emak saya suruh saya hantar sayur keladi kepada Tuan Muslim." Mulya masih berbahasa dengan Tuan Muslim.

"Saya tidak pernah tahu dan saya tidak pernah menjamah sayur keladi emak awak itu. Bagaimana hendak saya menyindir atau membeza-bezakan sayur keladi awak itu?" Bijak benar Tuan Muslim baling batu sembunyi tangan, fikirnya.

"Setiap kali saya hantar, Mak Som yang menyambutnya." Tuan Muslim terdiam seketika.

"Ini tentu kerja Mak Som pembantu rumah saya dengan anak buah saya, Zailan."

"Kerja Mak Som dan Zailan?" Kata-kata yang meluncur keluar dari mulut Tuan Muslim amat memeranjatkan.

"Mengapa mereka hendak buat begitu?" Hatinya bagaikan di selinap. Ngilunya amat terasa.

"Panjang ceritanya. Tetapi, Zailan pernah memberitahu saya yang dia suka kepada kamu. Dia pernah meluahkan hasrat hatinya untuk ber kawan dengan kamu. Kamu menolaknya."

"Ya, saya pernah menolaknya. Saya rasa masih terlalu awal untuk saya terlibat dalam kancuh percintaan. Perjuangan kami dalam lapangan pendidikan masih jauh. Saya perlu kejar cita-cita untuk berjaya."

"Nampaknya Zailan sudah kembali mengulangi perangai lamanya. Mungkin salah saya juga yang tidak pandai mendidik. Sejak kedua-dua ibu bapanya berpisah dan membawa haluan masing-masing hidup Zailan menjadi huru-hara. Jadi, saya mengambil keputusan untuk menjaganya. Zailan biasa hidup di bandar. Penuh dengan kemewahan dan keseronokan. Pergaulan yang bebas, hidup tidak terkawal dan kurang kasih sayang mungkin menjadi punca perubahan sikapnya."

Mulya membatu seketika. Pengakuan Tuan Muslim itu sedikit sebanyak membuatkan dia berfikir semula akan tindak-tanduk Zailan.

"Tentu Zailan telah mengugut Mak Som supaya tidak menghidangkan sayur keladi awak kepada saya. Mak Som sangat baik orangnya. Mak Som khuatir jika dia tidak menurut perintah Zailan, dia akan diberhentikan kerja. Sebenarnya, saya bukan hendak mempertahankan anak buah saya, tetapi Zailan bukanlah jahat sangat. Dia masih boleh dibentuk dan diselamatkan. Harapan saya, orang sekelilingnya dapat membantu. Saya berharap sangat, kawan-kawannya"

"Saya ... saya balik dulu Tuan Muslim." Mulya seperti kehabisan kata-kata. Dia mahu pulang segera. Dia tidak pasti hendak meletakkan kesalahan itu pada siapa sekarang ini.

Mulya tergesa-gesa berlari turun dari atas bukit, biarpun dia berasakan masih ada yang hendak dibicarakan oleh Tuan Muslim. Larian turunnya pada petang itu dihambat dengan pintaan maaf olah Tuan Muslim.

"Mulya, pak cik minta maaf bagi pihak Zailan." Buat pertama kali, Tuan Muslim yang dikenalnya sebagai ahli perniagaan, yang tinggal di atas bukit bukit agama menggelarkan dirinya pak cik dan meminta maaf.

PROFIL



© Mohd Helmi Ahmad, lulusan Ijazah Sarjana Muda Sastera (Bahasa dan Linguistik Melayu) Universiti Putra Malaysia (UPM) terbabit dalam penulisan cerpen, puisi dan rencana. Karyanya mendapat tempat dalam akhbar dan majalah arus perdana. Cerpennya, *Bunga Telur Kenduri Kahwin* memenangi Hadiah Penghargaan Hadiah Sastera Kumpulan Utusan-ExxonMobil (HSKU) 2010 Kategori Cerpen Remaja dan *Kuih Bakul Limau Mandarin* memenangi Hadiah Penghargaan Hadiah Sastera Kumpulan Utusan-ExxonMobil (HSKU) 2011 Kategori Cerpen Remaja. Memenangi Tempat Kedua Kategori Cerpen dan Sagu Hati Kategori Puisi Sayembara Menulis Cerpen dan Puisi ASASI 2011 anjuran ASASI.

Pengarang kreatif dipelawa menghantar cerpen bermutu dan bermoral ke halaman Sanggar Kreatif, Kembara, BH Ahad melalui e-mel bhsastera@bh.com.my. Pengirim wajib menyertakan biodata, nombor kad pengenalan, alamat lengkap, nombor telefon, gambar yang jelas berukuran 2 megabait menggunakan sistem JPEG, nombor akaun Maybank atau CIMB. Cerpen tidak boleh melebihi 110 barisan.

Sudut puisi

SELANGKAH 1435

i
Semakin hari, semakin kusirami tanah diri dengan mual dan tumbuh benih mabuk yang menyusuk - dalam kemabukan itu, semakin hari semakin kubaja tanah diri dengan tuba, aku belum upaya untuk berlari sendiri sedang perjalanan masih jauh dan belum (tidak) pasti - masihkah berbaki, tetapi semakin hari, semakin kuracuni diri dengan duri dalam hati, membengkak - aku semakin jauh dan menjarak.

ii
Musafir khuatir hamba damba kasa Pengasih; selangkah membuka lembar 1435.

WB RENDRA
Ulu Tiram, Johor Bahru

DENGAN TUNJANG IMAN

Tanpa suara kukirim kata terdera dengan rasa sengsara walau di mana ada dan tidak kelihatan rupa namun mendalam debarnya rindu membara cinta ketika bersua hanya pada angan resah dalam penantian melebarkan dugaan jarak dan ruang perkasihan namun ini persediaan kuteguhkan duhai kekasih dengan tunjang iman.

MARSLI NO
Kuantan
Oktober 4, 2013



HARI BAHARU: 1 MUHARAM

Bangkit lagi hari ini meniti usia yang diberikan Ilahi terima kasih ya Rabbi meminjamkan roh di tubuh ini.

Terbuka mata dan telinga hari ini bertambah impian dan cabaran namun dengan akal yang diberikan kita lukiskan gambaran garisan harapan dan pedoman letakkan batu tanda pengenalan agar kita tidak terduri-cari lusuh peta hidup yang belum pasti.

Ilhamkan aku, Maha Perindu moga tidak lagi terkeliru dalam memilih lorong dan hala tuju mendayang fikiran ke pulau

ilmu tanpa jemu merentasi gelombang nafsu segenap penjuru terlanjur tingkah, letakkan iman sebagai lampu agar kita melengkap nawaitu tulus mawaddah melimpahkan restu.

Fajar baharu menitiskan embun iradat Ilahi insaniah berbakti, luhur murni buktikan walau sezarah janji.

ZULKIFLI MOHD TOP
Kementerian Pelajaran Malaysia

MATAHARI PURBA ITU MUNCUL LAGI DI UFUK TIMUR

Matahari purba itu muncul lagi di ufuk timur bersama wajah seorang gadis tersenyum jujur yang membayangkan pada embun jernih dan maruah tak tercemar memenuhi janji semalam; sungai setia mengalir ke mana lagi kalau bukan muara? Namun entah berapa ramai manusia yang cukup licik mendustakan agama?

Hanya seungkap rasa keberuntungan sepasang ibu bapa yang berjaya melahirkan anak yang dengar kata senantiasa menghormati semua orang apa lagi orang tua dan begitu kaya pekerti mulia.

Namun aku melihatnya segugus semangat berkobar untuk giat berusaha dan berikhtiar membina masa depan dipenuhi sejuta sinar hidup diredhai Tuhan adalah sangat bermakna.

MOHD ADID AB RAHMAN
SMK Selandar, Selandar



BENDERA MARUAHKU

Benderaku berdarah, Ya Allah! perasaanku luka apabila terang menjadi taksa apabila senang menjadi seksa apabila gagah menjadi lemah.

Bukan kemenangan itu menang bertempur membunuh banyak orang tapi menang melawan nafsu dalam diri untuk bersedia memaafkan

semua orang.

Dadaku sebak, Ya Allah dadaku sebak melihat anak-anak melepak di padang-padang, di taman-taman membuang masa dengan bersidai di pinggir jalan dan di kaki lima kedai.

Gila mereka gila melaungkan kebebasan berpelukan di padang terbuka dengan bendera luka di tangan gila apakah mereka melaungkan merdeka tetapi jiwa masih terluka.

Bendera maruahku berdarah jangan sampai kita kembali terjajah menjadi jalur tragedi sejarah berkibar tetapi kalah merdeka tapi masih terjajah bebas tapi masih terpenjara tangan mengibarkan bendera hati kehilangan akidah.

Benderaku luka, Ya Allah melihat mereka yang merdeka tetapi dijajah oleh nafsu hingga tertanggal malu dari kehidupan Melayu yang kehilangan tuju.

SHAPIAI MOHD RAMLY
PPJ Batu Pahat, Johor

MENYUDAHKAN PERSIAPAN

Hati ini pecah ditekan suara dalam kuliah akal ini patah dirempuh asakan aksara ilmiah apabila tersedar akan realiti tragedi penyembelihan semalam sebangsa seagama merebut takhta menegakkan hak dan empunya kuasa terpecah angkara penyelewengan oleh Yahudi dajal dunia.

Di Malaysia kampungku sentosa damai diharmonikan santun susila tapi debu kedahsyatan deras dibawa angin mengoyak payung agama negara berubah menjadi nafas tak berjasad bernadi dalam akal yang diseleweng.

Isi filem bikinan Yahudi malah Nasrani citra armagedon jelas amaran Tuhan yang dinanti sekalian penganut yakni peperangan lalu kemenangan.

Dalam filem ditayang gambaran penerokaan ke Marikh bukan imaginasi apabila perang sampai ke detik akhir Yahudi malah Nasrani mengubah haluan membina negara di luar awan.

Apabila sesama Islam jelas berbunuhan maknanya kiamat sudah di hadapan marilah segera menyudahkan persiapan.

FIRDHAUS HASSAN
FSKIK UPSI